

02 FEB 2001

Mahathir-Wetland

TAMAN WETLAND SATU MANIFESTASI HUBUNGAN MANUSIA DAN ALAM, KATA PM

PUTRAJAYA, 2 Feb (Bernama) -- Perdana Menteri Datuk Seri Dr Mahathir Mohamad berkata Taman Wetland Putrajaya merupakan satu manifestasi hubungan diantara manusia dan alam.

Katanya, hubungan itu penting dalam usaha membangunkan negara yang mana perseimbangan pembangunan diantara manusia dan alam akan melahirkan negara yang indah dan maju.

"Taman Wetland ini selain menjadi kawasan tarikan semulajadi untuk orang ramai, ia juga satu kawasan memproses air untuk tasik buatan manusia di Putrajaya," katanya dalam kata-kata aluan dalam risalah acara perasmian Taman Wetland di sini hari ini.

Dr Mahathir pagi ini merasmikan Taman Wetland seluas 136 hektar itu sempena Hari Wetland Sedunia 2001.

Beliau berkata taman itu ibarat satu penapis besar yang mengalirkan air berkualiti untuk tasik buatan berkenaan.

"Kita bersyukur pembinaan Taman Wetland ini telah mencapai kejayaan dan dapat memenuhi peranan yang diharapkan darinya," kata beliau.

Disamping memenuhi peranan sebagai alat pembersihan, Taman Wetland turut menyumbang kepada pencapaian hasrat kerajaan untuk membangunkan Putrajaya sebagai bandar dalam taman, katanya.

Dr Mahathir berkata Taman Wetland telah mengambil tempatnya dalam rancangan penghijauan yang sedang giat diusahakan oleh kerajaan.

Beliau mengucapkan syabas dan tahniah kepada Perbadanan Putrajaya dan semua pihak yang terlibat atas usaha-usaha merancang dan menjayakan pembinaan taman itu.

--BERNAMA

NZ ES ES